

Nuortianaste

Bajasrakadus- ja čuvgitusbladde samidi.

»Gæca mon boadam farga«

»Leket maidai digis garvvasak.«

No. 10.

30ad Mai 1902.

4ad jakkodak.

Dat vaibmolades samaritanalaš

(Luk. 10, 25—37).

Lasse oudeb nummari

Lægo min aige oktage, gutte darbaša min vaibmoladesvuoda? Læ visaset! Hætte læ juokke aiggai nokka galle maielmest, ja vaibmolades samaritanalažaidi læ alelassi sagje. Ænam i dušše diti goččujuvvu »moraslækken.« Jos mi, sattašæimek luoiikas vaddet oanekassi goaskema soajaid ja allagasast vuolast gæccat, de boadašæimek mi oaidnet ovta mađohis olmušjoavko likkadæme ædnam alde, gæina muttomak čurruk, muttomak gillajek, muttomak fast čukket, ja muttomak luibmek sikke sielo ja rubmaš hædest.

Jurdaš oudamærka diti dam ala, atte vela læk arvo mielde 1000 million bakenak, guđek bæivalažak čukket ja gillajek bakenvuoda hirbmus varnotesvuoda vuolde. Igo dast juoga læt dakkamuššan du vaibmoladesvutti, don kristalaš olmai ja nisson!

Daihe jurdaš dai ollo vaivaši ja bucci ala birra buok min ædnamest — mutto i uccemusad sami ædnam boaito vuonain ja sulloin — ja jæra aldad: Imgo mon sate moftage vaibmoladesvuoda čajetet.

Muttomak min ædnamest lavvijek ninmuret ja celkket: »Æp mi arvvet, manditi nuft ollo ruđak galgek olgusbigjut bakenmiššioni.« Mutto daggar olbmuk æi oro jurdašæme, atte min rika olbmuk jakkasažat golatek bakenmiššioni dušše 500 duhat kr., mutto garrimjukkamušši sëmna aigest manna arvo mielde 40 million kr. — Jurdaš lokke! 80 gærde æmbo bigjujek mannat dam sielo ja rubmaš

vahagatte jukkamušši go miššioni.

Don gutte dam bitta logak! Boade mon čajetam dudnji soames baike, gost don berrek læt čajetæme vaibmoladesvuoda ja dam riftes vanhemiaednanrakisvuoda:

Mist læk dam aige ollo særvek, mak læk asatuvvum vaibmoladesvuoda dakkam varast, dai servi gaskast mattek namatuvvut: **Jugakættesvuoda ala bargam særve, diakonisse ja diakon ašše, submejuvvum manai sidak, boares olmui sidak, jörralam nissoni sidak, gielatemi ja bælljete mi asatusak, sami miššiona, sisædnam ja olgoædnam maraolbmai miššionä.** Buok dak læk samaritanalaš bargok, mak darbašek ja vürdek buokai, gæina samaritanalaš luonddo læ.

Lægo dust, lokke, samaritanalaža vaibmo, gutte arkalnasti ærai hæde? Daihe matakgo don oaidnet hæde ja gullat hættečuorvasa čoaska vaimoin? Ollok læk si, guđek dam sattek. Pappa sati dam dakkat, levita maidai. Mangas oidnek lagamuža duššamen sikke sielolažat ja rubmašlažat, mutto æi suormage likastatte su væketam diti. Man diti?

»Maid don must sidak?« cælkkä muttom; »læmgo mon mu vieljam gæccæ?« Mutto go don Kain sane mañest-cælkak, de læk don sëm mast muittaläm, manditi du gædnegasvuotta læ geiggit væketægje gieđa — dat læ du viellja, gutte gilla, son læ boccidäm dam sëmna maddagest go don, sidvneduvvum dam sëmna Ibmelest sëmna ælle mi, rakistuvvum sëmna rakisvuodain ja ostujuvvum sëmna varain go don. Erotus du ja dam gillajægje gaskast læ dušše dat, atte don Ibmelel ansaškættes vaibmo-

laðesvuodast læk boattäm ællema bæivaš-bællai ja son fertte vel muttom aige orrot suoivan-bæalde.

»Mutto læm be mon gædnegas addet ruđaidäm, maid mon nu lossadet læ fidnem?« jæra muttom æra. Nuft gukka go læ dušše sardnom rakisvuoda ja vaibmoladesvuoda birra læk galle davalažat mielde dasa miðetæme — muttomak vel gadnjalidige golgatet go gullek sardnujuvvumen ærai darbaš ja hæde birra. Mutto go Hærra su balvægjidet bokte čujuta duom daihe dam darbašlaš ja avkalaš dakkamuša ala, mi gaibbeda ad-dam uša, dallanaga olbmuk dasa æi liko. Ibmelel balvvalet njalmin i læk vaddes, rakistet Ibmelel njalmin ja njuokčæmin satta mæsta juokkehaš. Mutto balvvalet Ibmelel daina, mi mist læ — rakistet dagost ja duottavuodast — dat læ vaddascebbo, ja almaken die læ dat, maid Hærra mist gaibbeda, ja maid vel dat æppeoskolaš maielmege fertte divrrasen adnet. Gærde boatta min ouddi dat gačaldak: »Maid læk don dakkam Hærra »uccemusai« oudast maielmest?« (Math. 25, 40).

»Dat i oro læme go joavddeles barggo oaffaruššat ja oaffaruššat alelassi olmui diti, gæi mi æp læt vel oaidnamege,« cælkkä goalmad, »ja gæina mi æp goassege matte vuordet ruoktot maksema.«

„Oaffaruššat,“ Matakgo don cælkket, atte don goassege læk oaffaruššam? Nuft gukka go don ik læt aldad biettalam ik vuolaflasko ikge duppatbipoge, de don ik berre nu alladet sardnot oaffaruššama birra. — Muite maidai dam, atte dak æi læk du obmudagak, maiguim don rampastalak. Don læk dušše kasserar, dai-

he æra saniguim cækket, dudnji læ oanekes boddoi oskelduvvum væhaš Ibmel kasast. Ja alma dat i læk æmbo go govtolaš, atte kasserar olgusmaks daid rekkigid, maid su ised sadne-doalvoides bokte su goččo makset. Fuones kasserar læ dat, gutte dam i daga.

Muttom njæljad jurdaša vaimos siste: »Na juo, gal monge væhaš ad-dašim, jos mon dam diedašim, atte diettavassi addujuvvuši avisai bokte daihe muđoi; mutto addet nuft, atte i oktage ærago dat, gæssa mon addam oažo dam diettet — dam mon im galle viša.«

Ustebam! Ibmel alelassi oaidna du, son čalla bajas juokke evre, mi addujuvvu ovtagerdan vaibmolades-vuođast. Vel ovtá galma čačceglašge addujuvvum Jesus namast, i galgga su balkast masset. Nuft cælkka Jesus ješ (Math. 10, 42). Loga maidai Math. 25, 34—40, de don oainak, atte Ibmel čalla bajas

Buristsivdneuvvum lekus juokke olmai ja juokke nisson, gutte gagjom ja væketægje gieđa geigge sikke rubmašlaš ja vuoinašlaš hædalažaidi — gutte i ane ječas ila buorren vaivaš hættegillajægje bærraši daloidi mannat sielo ja rubmaša borramušain. Buristsivdneuvvum galgek si læt vaibmoladesvuođa Ibmest.

Min aige læ nuft ollo dast, maid dača goččo sofakristalašvuottan. Gæppa ašše læ galle kristalažžan læt dam lakkai go mangas dam valdek. Olbmuk likojek davalažat gullat Ibmel sane sardneuvvumen, ja mangas gæččælet maidai ječa sardnedet. Mutto go Jesusa oapo mielde galgga dakkujuvvut, — vuoi dadde man uce dat joavkko mi dam viggata. Ollok sittek gal Jesusa njalgisvuođast navdašet, mutto gillat suina si æi siða.

Rakis ustebidam! Dat »kristalašvuotta«, mi i siða Jesusin gillat i læk Kristusa »kristalašvuotta.« Jos Basse-vuoigŋa læ du vaibmoi bæssam, de dat viggata du dam vaibmolades samaritanalaža bargo dakkat; mutto mi ferttep Vuoina jidni gululažat læt.

Sladdaris ja mirkolaš olbmuk.

Sisasaddijuvvum.

Lasse oudeb nummari.

Rakis lokke! læžak nuorra daihe boares, rigges daihe gæfhe, vises

daihe jalla, kristalaš daihe ibmelmættom, de valde vutti, maid mon dast ravvim dudnji, atte varotak ječad buok du gæinoidak alde. Alle sarno lagamužak sælgebældde ja alle hala nubbid fæilaid diti, go dustge læ dat sæmma. Ale golad du aigad sladdarvuođain, allege dævde du vaimod sladdariguim, go don gosage vuolgak. Ale æcce maielme slarvaid, ja ale æle sin ællema, ja alege difte ječak hokkatuvvut ja fillijuvvut dam maielmest Ale visastala ja ale doarred dam maielme gudne; dastgo dast læ slavalaš ja varnotes ællem. Ale ravast du njalmad galljin, amak dam sisa ješ hævanet, mutto varjal dam, de don varjalak du silokge. Ale addestala du lagamužak, amasek bærgalagak vuoittet du helveti ja dobbe fast du addestallat. Ale bagjelmaeralazažat činad ja finutala ječad du nuorravuodastak. Ale jođe alla ja gorgis mielain alege harjet jiečak čævlas ællemil! Ale jurdaš dam, atte don læk buoreb ja divrasæbbo go du lagamuš; mutto læge buorre ja ustelaš buokaidi juokkelakkai! Muite, atte gutte ješječas aleda, son šadda vuoleduvvut, ja gutte ješječas vuoleđa šadda okti aleduvvut; dastgo Hærra čuožžo čævlas olbmui vuostai; mutto vuollegažaidi adda son su armos. Læge stađis ja gudnalaš ællemestak, ja læge ilolaš vigitesvuođa siste! Vallje aldsesak ibmelbalolaš ællema! Ane butte jurdagid luttak ja læge vuoiggadlaš vaimostak ja rehalaš du lagamužak vuostai! Ale ašaskutte su du ječak vuoto diti, alege fille ovtage buostovutti! amad okti duomobceive šaddat logo dakkat sin suddoi oudast.

Ale mana gænge gaski, ja ale rivat dam buore, mi nubbai læ fallujuvvum, amas buristsivdnadusa oudadus dust erit gaidat ja amad dam sagjai garrodusa buktet bagjelasak! Dastgo don galgak muittet, atte daina don goitge ik bæsa ovtage dimo æri oudabællai; mutto don læk lika daid ovtai ja sæmma beivi siste nuftgo buok ærakge vaiko vuotašik buok maielme. Rokkadala du matkeguomak oudast, vai songe okti joavdaši dam basse ja hævas Sion-gavpugil! Difte du lagamužak hettekætta fidnet aldisis dam buore, maid son læ ožudæme! Gæča suge avke bællai sæmma burist go ječad avke bællai, alege bagjelgæča ja bilkked ovtage, jos vel man fuodne son læža, mutto ane suge sæmma arvost go ješječak; dastgo son maidai læ dat sæmma divrras davver Ibmeli go donge, ja su hægga ja siello læ olgusvuolggam dam sæmma agjagest go duge. Ale dubme gænge jierme su davalaš sagai mielde, dastgo muđoi satta son oappalæbbo ja visasæbbo go don, nuft atte æra dafhost son manna bagjel du jierme. Ale dubme ovtage ibmelmættona su suddoides siste, ige ovtage os-

kočærda, gutte Jesusa lonastusa ala vuođdođa, su osko diti, vaiko son buok baiked i oktiboade duina ibmardusast dasto mist i læk æra duobmar go dat okta aino Ibmel.

Mi oskočærdaidi boatta, de galle mu jakko læ dat, atte Ibmest læk manak buok daggar oskočærdain, gost Kristusa soavatus varra su sagjases bæssa. Mutto dat stuoremus gæaldak læ dat: Lækggo mi ođdasist riegdain Jurdaš, lokke, atte i mist læk dušše okta ællem; dat armoaigge læ dabe nokkavaš ja farga vassa, ja agalašvuotta ouddanboatta silloi. Juokke dimost min akke oadnana, dat i gukku goassege. Juokke lavkest mi vazzep jabmin guvlui; alo mi dasa lakkanep. Dam mi æp gal ječa oainie æpge dovda, man lakka dat læža, ja mi æp gal dieđe gost ja goas dat min onddi joavdda; mutto okti mi vælttekætta šaddap ja ferttip daina gavdnadet, juogo arad nuorravuodast daihe maŋned boaresvuođast.

Buok dam maielme gudne ja ællo, maid mi dabe dam ædnam alde æigastallat, læ duššalaš ja nokkavaš. Min armoaigge golgga ja erit gaidda nuft jottelet dego garraset golgge jo-ga ravdnje. Min rubmašlaš ællem vassa ja erit battara nuft hoapost dego ija niekko; mutto jurdaš olbmucam dam maŋnest čuoŋvo agalaš sikke albme ja helvet, ja gæidno dabe læ ravas guktoi guvllui. Barggop mi valljit dam gæino, mi agalaš illoi manna, dastgo lakka satta dat bæivve læt, go mi dabe oažžop ærranet. O divrras lokke, guoratala ječad, goabba guvllui don doalvok du sillod bestujubmai vai hævatussil! Guoratala guoabba du vaimo læ læidemen, Basse-vuoigŋa su riftes čuvgis gæinos mielde agalaš ællema, vai suddo vuoigŋa su lappujume sevdnjis balgai mielde agalaš gædotussi. Jos nuorra læk, de vallji ællet dam čabba ællema Kristus siste; dastgo dat læ sagga buoreb ja likkolæbbo go suddo slavavuođa balvvalus. Ja jos don vuoras olmuš læk, de jurdaš, man ollo lavkek læk vel dassa go havdai guossa lak.

Gæča siello! Dam bældde jabmendæmo sœvva okta hævas gadde, man agalaš čuvgis gæstest lifči sagje mudnji ja dudnji ja buok olbmuidi oednam alde. Gæse osko-borjasidak bajas du matkeskipasak, de farga don dokko bæsak. Valde Jesusa aldsak stivriijægjen, go bærgalaga ja maielme garrabiegak bossogottek, amasek dak hævatusa biegak ja barok gomitet du vuoina skipa. Nuftgo guosse læk don dabe nuftgo du vanhema; mutto gosa valljit don aldsak agalaš assamsaje, dam almalaš krystal gavpugi, man balgak læk dakkujuvvum gollest, vai dam buolle riššajavrai. Okti šaddak don, siello, dabe eritfarret, du ællem-ækked lakkana jotteles lav-

kiguim. Gi dietta man ollo armodimok vela ain ležek du ællemest, dak daidek juo farga buok læk olguslok-kujuvvum ja ċaskujuvvum. Du ælema dibmoglase daida visut læt juo guorranæme, ja dam minutak buok olgusgolggamen; dam sisa i daide sat armo bæivaš bæssat gukkeb suonjar-det.

O vaivan suddolaš! Mofit læ du ællem, ja mofit læ du sielo dille? Gosa vagjolak don? Gosa doalvyo du matke? Muite, atte armo-aigge maidai sæmmast ċuovvo du mietta juokke sagjai, gosa don jodešak dabe ædnam alde ja læ duina alo ovta farost gidda ærranæme poarta ragjai; de dasa don šaddak dam guoddek; dastgo dasa dat bacca ja orosta, ige dat oažo sat du ċuovvot. Mutto gosa lœkkasa dast ukša du silloi, ċuvvggis hærvasvutti vai surgadlaš varnotesvutti.

Guoratala siello du vaimostak goabbak læk juo illodæme vuostai-valddet du boatemala, Ibmel basse engelak ahnest, vai bærgalaga vuoinak helvetest. Fuomaš du matkestak goabba sagjai don læk vagjolæme Ibmel hærvas truono oudi su basse rikast vai bahavuoinai lusa jabmen appai.

Rakis lokkel! Alle olloš daid mu ċallemid; dastgo dak æi læk duššek, maid mon dasa læm stilem. Alle imašt mu dai ċallemidam diti; dastgo mu vaibmo læ boattam dam dovddoi, man birra mon dast læm ċallam.

Jos ovtage min blade lokkin gavdna goggoge dam mu ċallagest maidege feilaid, de lekus son nu buorre atte ċalla dam birra »Nuorttanastai« boatte daihe dast-maneb nummari ja ċajetekus goggo feila læ.

S. A. S.

Væhaš mastge.

Ruošaædnæmest

læ okta sierrasærvve, mi goċċujuvvu stundistsærvven. Dam aige šadda dat birbmadet doarradallujuvvut Kiewast ja Charkoffast. Juokke okta, gutte manna sin ċoaggalmásain oažžo 25 ċaskastaga toavvaċuolmast. Giddagasak (arestak) læk devddujuvvum stundistain.

Judalaš nalest

gavdnujek papak Engelandast gaskal 3 ja 4 ċuode, vel engelaš bispakge læk judalaš sogast.

Lord Roostock

Engelandast læ oudastolmai muttom særvvest, gæi aiggomuš læ skenkkit bibala juokke olbmai ja juokke nissoni

Indiast, go si læk oappam lokkat ja haledek bibala avkenæsek adnet.

Okta statistikka,

mi læ bajasvalddujuvvum 8ad februar d. j., ċajeta, atte dam manemus 8 manost læ sisavagjulus Amerikai læmaš 50,000 (vitta loge duhat) olbmu æmbo go sæmma aigest mannam jage.

Koartaspallam vistek

læk gilddujuvvum dam belgialaš stuoradiggest — 93 olbma legje dai visti vuostai ja 7 mitte. Obba Belgiast læ dalle nabbo gilddujuvvum daggar vistid doallat.

Okta surgadlaš raddetus

læ dam aigai Tyrkiast. Ćuđi mielde officerak juokke gradast læk šaddam aresterijuvvut daina manemus beivin. Sultana cuiggok nuft ballat jabnemest, atte son læ mielatæbme. Orro ċajetæme, atte »sorbmiægje truono alde« læ garrim Armenia varast

Judalaš missionast

læk dam manemus 75 jagest barggam 400 miššionærak, — bakeni miššionast fast 91,259 bargek. Dam aigest læk jorggaluvvum kristalašvutti 150,000 Judalažak ja 4,414,236 bakenak. Judalaš miššion oidnu dam lakkai læme dat šaddolæmus vaiko vad-desvuodak læk læmaš lokkamættomak.

Bibala viddedæme birra

ċalla okta miššionær, gutte ollo jagid læ barggam bakeni maielmest: »Mađe gukkep mon bargam, de æmbo vissasmuvan mon dam jakkoi, atte æmbo bakenak ja muhamedanalažak bottek morridussi ja jorggalussi lokkama bokte Ibmel sanest go olbmui sardnedæma bokte. Vaiko galle manga bibal jorggalusa læk ollesmættomak, almaken dovddasta dat buorre ja vaibmolađes Ibmel ječas daidi, Ja ollok læk si, guđek ċikkusest dutkek bibala, daggarak, guđek æi gudnesek diti duosta mannat ovtage miššionæra sardnai, æige duosta sarnotallat ovtage kristalaža. Dam laganak læk goitgaskavuoda gavvatusak Indiast.«

Mi berrep damditi læk vaimostæmek gittevažak dam stuora bargo oudast, mi læ dakkujuvvum ja ain dakkujuvvu dai stuora bibal-servi bælest, gæk dam aige ragjai læk basse ċallaga daihe osid dast jorggalam ja

viddedam 432 njuokċamgielaidi. Dak jorggalusak galggek — mađe gukkeb maielme ċuožžo dađe æmbo — ċajetet atte dak læk oavsek dam muorast, mi læ gilvvujuvvum ċacce-agjagi gaddai ja man lieđek læk bakenidi dalkkastussan.

India

nissoni særvvest bargga okta burist oappam nisson, gan namma læ Punditi Ramabai. Son læ Ibmelst stuora armo-addaldagaid ožžom. Dat miššionsærvve mast son bargga goċċujuvvu »Muktimiššionan,« ja dam særvve lattok læk dušše India nissonak, sin lokko læ 800. Punditi Ramabai skuvlain læk dam aiggai 2000 indialaš nieiddamanak. Dat stuora tala i matte ærago illodattet daggar vaimoid, mak rakistet min Hærramek Jesus Kristus evangelium oudanæme. Mutto vuoi man uccan læ almaken dat lokko India millionai gaskast, go mi gullat, atte ċuode million dam ædnam nissonin æi matte lokkat æige ċallet, ja atte juokke viđad nisson læ læska. Dušše Bengalast gavdnujek 7000 læska.

Girje „Nuorttanastai“

Mon aigom soames sâne ċallet „Nuorttanaste“ lokkedi ja muittalet væhaš dam guovlost. Dalvve læi dam jage hirbmad garas, buollašak ja muottaborgak læk læmaš mietta dalve. Gidđa læ maidai læmaš gukke ja garast. Dal læ juo mai manno bagjel gaskarajest, mutto ain læ olles dalvve, æsga soames bæive læ bæivaš liegga-set baittam.

Olbmuk læk juo boattalam dan nuft-goċċujuvvum gidđabivdost, mutto dat læi aibas oanekas. Dat dam aiggasaš mæravašalaš, »Ruoša njuorjo,« bođi ja buok gulin manai, ja olbmuk ferttiegjæ diettalassi vuolggæt ješguttek sidaidasasek. Juogalagan gaskaoame adna Ibmel, man bokte son burides orro erit valddemen olbmui, ja son muittota daggobokte sigjidi sin stuora gittemættomvuoda, ja mofit si manga have boastot adnet Ibmel burid addaldagaid, go olbmuk bagjelmæralaš ællem bokte skittardek dai aiggasaš burid, maid si stuora bargoin ja vaivin fidnejek, ja mai bokte rumaš šaddaši gukkis aigid bibmujuvvut, go dak riftes lakkai adnujuvvue.

Dat oidnujuvvu erinoamašet stuora fiskobaiken, man lakkai dak likkotes olbmuk elek ja männodek, moft si oaffaruššek suddo balvvalussi buok aiggesek ja obmudagasek. Olmuš dobbe oaidna, moft nuorragærdde læ joavddam koarttaspeallam, garrodæme ja vinejukkam slavavuoda vuollai, moft si læk garvas buttesmættom ja slæiddo sagai sardnot ja dam lakkai oaffaruššek nuorravuoda buoremus aige sielo vašalazži, ja æs-ga go boaresen šaddek, muttomak alma goit dalle aiggok sin goike mieska davtidæsek Hærrai guoddet. Mutto daggar gævatus i læk Hærra dato mielde, dam dietta juokkehaš.

Fiskoværain oaidna olmuš nuoraid, mak illa læk vela agest olles olbmuk, særvvamen boarrasæbbuiguim šlarvaællemi, nuftgo garrodæbmai ja nuoskes sagadi. Dobbe garroduvvujek maidai si, guđek læk bigjujuvvum boerraigæččat færa maid, gæk datošegje, atte stivra galggaši læt olmuin. Garrodemin vulggek si mæra ala, ja garrodemin bottek si gaddai. Koarttaspeallambævdde læ sin oadđamrokus, ja idedest čalmek čuvvggidattujuvvujek vinejugastagain. Buok dam matta juokkehaš, gutte fiskoværain læ læmaš, duodašet, gutte læ oaidnam sabmelažai, suobmelažai ja darolažai männodusa. Orrok olbmuk dego gilvotallamen dasa, mi baha læ. — Aigge lifči galle čalmi ravastet ja oudast gullui gæččat.

Tanajogast 20ad mai 1902

J. H.

E. Andreassen Buolmagest

čalla dam blađe oldusaddai ja muittala, atte Ibmel su bodnetes rakisvuodastes læ oappaladdam su dalo, daggo bokte atte son læ buorren oaidnam valddet su nuorab vielja, Johan Andreassen, dam 30ad bæive april manost. Son, nuftgo ollo ærak, læi fiskoi mannam Kvitnæssi, ige læm dobbe go moadde bæive ouddalgo buoccai ja fertti Vargai buoccamvisos vuolgget. Ja go son læi dobbe 6 bæive læmaš, de dat vuorddekættes losses sakka bođi sidi: Son læ jabman. Dat læi galle lossat gullat sikke vanhemidi ja vieljaidi ja fulkidi; mutto dam lossis morraša siste læ almaken čuovgga-suonjar go mi gullap, atte Vargai pappa čalla: »Dat nuorra olmai jami

osko siste su bæstes ala.« Daid, sanid muittoti maidai suokkanpappa Opdahl havddesarnestes Buolmak girkkogardest. Andreassen čalla: »Dat læi migjidi jeđđetussan, atte son Kristusa læi oecam ja gavdnam.« Aito nuft, dat berre læt migjidi jeđđetussam allelašši, go jabmen mist valdda dam buok rakkasæmusa; dastgo mi diettep, atte go min rakkasak Kristusa læk gavdnam, de sin jabmen læ sigjidi vuoitton — si bottet buoreb sidi ja buoreb dillai go dat mi dabe ædnam alde læ. Mi æp berre morastet, mutto barggat dam ala, atte mige ječa lifčimek garvasak juokke boddo dam maielmest ærranet; dastgo æp mi diegoas min maņemus boddo boatta.

Mannam sodnabæive, go mon čoaggalmasa dollim muttom njargast Hassel gieldest dabe Vesteraalast, jami okta nisson min čoaggalmasast. Son læi dærvæš go sisabođi nuftgo buok ærak. Son čokkai sardneviesost bænkala alde ja guldali sarne ja læi maidai særvvest lavllomen loapatam salma. »Gittos gudne agalažat lekus dudnji Jesusam« j. n. v.; mutto go dam salma maņemus sanek legjo lavluluvvum, de rotti son hægas ja læi jabman. Sust læi boadnja ja vitta mana Lokke læge gærgos. Du maņemus boddo satta læt lagab go don jurdašak.

Dam maņemus doarradallujume

vuolde Kinast læ Kina sisædnam miššiona gillam ænemusad. 18 olbma ja 33 nissona ja 41 mana sorbmijuvvujege. Muttomak daina nissonin legje miššionærai akak ja dak ærak legjenaittalkættes miššionsærvvest olgusaddijuvvum nissonak. Dak sorbmijuvvum manak gulle miššionæraidi. Æi læk vela sagak boattam buok stationain sistædnamest, nuft atte dai sorbmijuvvumi lokko satta læt vel stuoreb.

Boarsoatte

fal bista ain. Æi oro soapamen rafhe dakkat.

Vestindia

dollačollovarek æi læk vela jaskudam. Ođđa raigek rappasek. Olbmuk daina guovloin læk hirbmadet balost.

Čoaska læk dalkek dabege Vesteraalast, vaiko læ juo mai manno mannam. Muottaborgga ja væstabiægga læ juokke bæive.

Girkkohistorjalaš muittalusak. Dat religionas dille maielmest Kristus riegam aige.

Lasse oudeb nummari.

Vuost galggap mi muittet, atte dat dietto læi dušše muttomi daina ænemusad čuvvgijuvvum olbmu oabme, ja dak æi adnam maidege fuolaid sin dieđosek viddedet æraidi, daihe albmuga dakkat dam dittoi oasalažžan. Čevllastallamin ja gorggis miellain gečče si vuolas albmuga ala, oskodedinæsek, atte albmuk i arved maidege daggar alla oapoin, ja atte buoremus læ sin diktet orrot sin joavddelas æppeibmelbalvvalusa siste.

Maidai min aige gavdnujek daggar olbmuk, guđek jakket ječaidæsek nuft visesen šaddam, atte si dam boares bibalosko æi darbaš. Maidai si celkkek: »Gal dat læ buorre albmugi, gutte diettemættomvuoda dilest læ, mutto si dast æi fuola; dastgo si læk boattam buttasæbbo ja aleb čuovggasi ja dittoi. Nuftgo alelassi buok gorggis ješječas aledæbme rangasta ječas, nuft fertti maidai dai bakeni lutte dat apostal sadne duottavuottan šaddat: »Go si ječaidæsek celkke læt visesen, šadde si jallan.« Dat manai singuim, nuftgo dai olbmuiguim, guđek aiggo rakadet dam babylonalaš toarna; Ibmel moivi sin giela. Dak oappo-rakkanusak, maid si hæjos oalgotusast bajas-čeggijegje vuostalagaid šadde aibas, ja birra buok læi naggo ja rido sin gaskast. Go apostal Paulus okti Athenest loaidasti ouddan sardnedet Kristus evangelium, šaddai son oktiguoskat muttomiguim daina vises olbmain. Apostali dagoin muittaluvvu, atte muttom Epikurealaš ja Stoikalaš filosofak naggatallagotte suina.

Embo.

„Nuorttanaste“

olgušboatta 2 gærde manost — dam 15ad ja dam 30ad bæive juokke manost — ja maksa kr. 1,00 — ovta kruvna jakkodagast ja kruvnoale daibe 50 ora jakkebælest.

Bladde matta dingjuvvut juokke poastarappe lutte, komiššionærai lutte ja olgosaddest G. F. Lund Sigerfjord, Vesteraalen.

»Nuorttanaste čalle prentejægje ja olgosadde læ G. F. Lund Sigerfjord, Vesteraalen.